

AW HEPIPA PASIAN IN KA LUNGSIM SUNG AH KHUN

Chawngkhupa Ralte

Pu Chawngkhupa Ralte khu Pu Kawldingpuia leh Pi Challianthangi-te nupa apat April 09, 1909 jinglam 7:00am (Good Friday jingmawng) in ana pieng a, Ama khu paneu deu mai feet-5 zong ching lou ahia, anaupan lai apat in Sailam khuo ah ana khosa uhi.

Kum 1932 in Raldorumi Vangchhia toh Pasian leh a Hattuumte theipi in Pastor Hauchhunga in Sialsuk Biehinn ah nupa hinkhuo zangkhawm ding in ana gawm hi. Pasian apat goutan ta pasal-3 leh numei-2 anei ua, amaute khu: Vanlalhruaia, Vanlalhlira, Khawtinthangi, Vanlalpari leh Lalropuia ahi uhi.

Kum 1950 in Bilkhawthlir khuo ah a pamlut ua, inn leh lou duhdah zong neilou in a vahvai mama hi. May 27, 1990 in Ngaizel kawh ah akie a, khumna pat dam khe zou talou in June 24, 1990 jinglam 3:25am in “Silsiem zousiete khun Pasian in atate a suhlat hun a ngahla mama uhi” chia ana taangkoupipa Pasian kung ah khawdam ding in anahhu tawp in ana muolliemta hi. Aluong khu anau Chipuithanga tapa R. Lalpianluanga in akhuo uh Sihphir ah ala a, a zingni June 25, 1990 in mithupitah bang in thupitah in vuiliem in ana umta hi.

Pu Chawngkhupa Ralte tanchin gentu tamtahten a gen dan uh a kibang sih a, penglam tangthu kigen bang in thei sieng chi umlou in a kizom a gen detdet thei zong ana um sih uhi. Ama a lim nasat laitah khu 1936 vel hiding a gintat ahia, 1927 apat in milim suol bang in a um a, tuachiin mite etsat leh gengen in a um hi. Alim chieng in buchil/pawlchil bang in a um a, a laam zel a, “Kalvari a Na hepina khu, Thangsuoh naw hen sietlei namchin lai ah” chi laa asa nuom mama a, lasa kawm in a kap huphup mai a, a chi ding dan theilou in atawp chieng in “A!! Mangpa Nangma

Aw hepipa Pasion in - 2 leh Nangma hing kipanpi mai tan” pou achi zel hi. Adieh in 1933 a, tapa khat anei apat in inn-le-lou zong ngaisah zou nawnlou khop in a vah a, kum 1936 Good Friday nitah kikhop apat in Hagau pawlna tamsem tang in mite theisiem theilou ding khop in ana um hi. Tuami ni apat in “Aw hepipa Pasion in” chi lathu in ahing pawl a, tam hun apat a gamtat dan leh a umdante theisiemlou in Hausapa leh mipite lungmuong theilou in “Siakol” a bunsah ua, Hausapu Lalthawvenga thupieh dungzui in RIP sung ah a gentheitah in a kulkhumta uhi.

Tuachia “RIP” sung a, a khum kawm un tangvalten sun-le-zan in a veng zing uhi. Pasion in laa apieh khu Aizawl Jail (Taan-inn) a puong ding a, asawl ahizieh in Aizawl Jail a tun theina ding Pasion in a guotsah bang in a um hi. Zan khat guo nasatah in ahing zu a, zan sawt nua in ama vengtute tangvalte zong a kimu (sleep) siengta uhi.

Tuachia ama vengtu tangvalte a kimut kaal un Pu Chawngkhupa Ralte khu Pasion in ahing hakheta a, Aizawl lam zuon a pei in Khuangzik khuo ah satin (niliep) kawm in azanzan in a pei vengvengta hi. Khovah kuon ah-khuon in Sialsuk khuo atung a, pei zel in Hmuitang taang dung atun in a gil ahing kiel simta a, tuanah pa-ardang achi uh khat amu a, tuami gilvatah in ane hi. Hing pei zel in Kelsih Hausapa Lasailova kung ah taan-inn (Jail) a taan theina ding lai a ngen a, hausapan zong taan-inn a taan theina ding lai gelsah in tua khu a tawita hi. Jail vengtuten zong jail (taan-inn) a um ding ana phalsah ua, tuachiin jail sung ah um in tam laa “Aw hepina Pasion in, ka lungsim sung ah khun, Hing pieh hagau nuomna khu” chi in ahing puongkheta hi.

Tambang a Jail sung a taangkoupi a, a sahsah chieng in jail vengtute nasan in zong ngaichim kisa gawp in a phawhlaw hiel uhi. Tuachiin tam laa ngaitah Mizoram gam buppi ah a hing thangsuoah hi. Tam laa khu Ramhlun Kohhran

Aw hepipa Pasian in - 3 (Hattuum) Lapawl ten zil in Biehinnsung ah asa masapen uh a kichi hi.

HEPIPA PASIAN IN

1. Aw hepipa Pasian in,
Ka lungsim sung ah khun;
Hing pieh Hagau nuomna khu,
Van leh simlei ah adim e.

Pasian in a pieh a lungsim sung a kipahna thu umte zieh in miten mimaw hisah nanleh ama sung ah dimlet ahi chi a theichien in.

Mihing leh mipilna in,
A geldoh zou vawtsih va uh;
Ka Hundampa na thuguh khu.

Mihing pilna in Pasian pilna leh a hund amna thuguuh khu a geel doh zousih a, tuachiin mi tamtahten a nuol zel uhi. Hinanleh tam Pu Chawngkhupa in a theichien mama a, a motpi ahi deu mai a, Khrist a ding a mimaw (Fool for Christ) himai ahi.

2. Aw hepina a sang e,
Simlei pilna sang in;
Hagau hinna hing pieh khu,
Aw ka hinna Mangpa phat in.

Pasian hepina a saang a gel phaah zong ahisih a, Hagau hinna ahing pie hi. Tuazieh in Pu David in "Ka hinna aw Mangpa phat in" achi bang in Pu Chawngkhupa in zong "Aw ka hinna Mangpa phat in" ana chi hi.

3. Aw kei mikhiel mangsa khu,
A hepina vang in;
Hagau nuomna hing pieh khu,
Simlei pilna'n a zoulou e.

Mi khiel mangthaisa, shisa hinanlei pasian hepina zieh in hinna ahing pie a, Hagau lungmuonna ahing pie hi chipen

Pu Chawngkunga in ana theichien mama hi. Pasion itna, hepina, khotuonate khu mihing pilna in a geel phasih a, Pasion umlou chi tanpha zong a um mawh hi.

Tuniin eiten Pasion itna i theichien ngel na uoi? Pasion zieh in mimaw i tang ngap uoi? Pasion zieh in nunopnate i taan ngam ngel na uoi? Pu Chawngkhupa khu Pasion in asawl zieh in jail a taang ding in a kuon mawh hi. Eite la bangtan ah Pasion hepina i thei zou in i kinga zou ding uoi?

Min Pasion thu khu a motpi ngam uhi. Eiten Pasion thu khu kipilsahna in i zang ua, apilpen hiding kidem in Committee leh nasepnate bang ah i kiniel zel uhi. Pasion mii hina nei tahtahte khu a kingainiem ua, pil a utsih uhi. Hinanleh Pasion in akung ua thu agen khu a kilepsan ngaisih uhi.

“Kross thu khu mangthangte a ding in mothuo i ahia, hinanleh ei hundam a umte a ding in Pasion silbawltheina ahi. Aziehpén, ‘Mipil pilna ka suse ding a, lemguottu theisiemna bangmalou ka suohsah ding hi’ chi a gel bang in. Mipil hei ah a um ei? Laigielmi hei ah a um ei? Tam leitung a miselkhapa hei a um ahiei? Pasion in tam leitung p[ilna mothuo i a suohsah sih amah? (I Kor. 1:18-20)

.....